

Soki ozali na bondimi wana, ezali malamu. Kasi tika ngai natuna
yo:

Eloko nini nde epesaka yo bondimi wana?

- *Bondimi na yo?*
- *Lingomba to denomination na yo?*
- *Misala malamu na yo?*
- *To eloko mosusu?*

Soki ozali kokanisa ete mpo ete ondimi Yesu kaka, yango esili
kopesa yo ndanga ete okokende elongo na Ye tango akoya, yoka
malamu oyo:

Moto akoki kondima Yesu, kasi atikala kokende elongo na Ye
tango akoya.

Soki ezali denomination na yo nde epesaka yo bondimi, yeba ete
kozala kaka na lingomba moko to na groupe moko ya losambo
ekoki te.

Ata soki denomination ezali ya malamu mpe nkombo ya lingomba
eyebani mingi, okoki kaka kozanga mokolo ya kozonga na Ye.

Soki bondimi na yo etongami na misala malamumu na yo —
ete oyibaka te, olapaka mabe te, osalisaka bato, ozali na bizaleli
malamumu —
soki nyonso wana nde epesaka yo bondimi, yeba ete okoki kaka
kozanga Ye tango akoya.

Boye, eloko nini mpenza epesaka moto bondimi ya solo ete
akokende elongo na Nkolo tango akoya?

Tótala eyano na maloba ya Nkolo Yesu Ye moko, Moto oyo azali
koya lisusu:

Yoane 3:1-3

*“Ezalaki na mobali moko ya Bafarizeo, nkombo na ye
Nikodemo, mokonzi moko ya Bayuda.*

*Ayaki epai ya Yesu na butu mpe alobaki na Ye: ‘Rabi, toyebi
ete ozali molakisi oyo awuti epai ya Nzambe, pamba te moto
moko te akoki kosala bilembo oyo osalaka soki Nzambe azali
elongo na ye te.’*

*Yesu azongisaki ye: ‘Solo, solo, nazali koloba na yo: soki moto
abotami lisusu te, akoki komona Bokonzi ya Nzambe te.’”*

Boye, elembo ya solo ya moto oyo akomona Nkolo na mokolo
wana ezali nini?

Ezali denomination te, pamba te Nikodemo azalaki ya moko ya
biteni ya lingomba ya Bayuda oyo ezalaki makasi mpe ekumisami
mingi: Bafarizeo.

Ezali kaka bondimi na Nzambe te, pamba te Nikodemo abandaki
kondima Nzambe mpe andimaki ete Yesu awuti epai ya Nzambe.

Nzokande, Yesu alobaki na ye:

“Esengeli obotama lisusu.”

Yango elingi koloba ete bondimi kaka, kozala na lingomba, mpe
ata misala malamuni ekoki te.

Yesu azali kotya motuya na mbongwana ya molimo — kobotama
ya sika na Molimo.

Kobotama Lisusu Elingi Koloba Nini?

Yesu alimboli lisusu:

Yoane 3:5

“Solo, solo, nazali koloba na yo: soki moto abotami te na mayi mpe na Molimo, akoki kokota na Bokonzi ya Nzambe te.”

“Kobotama na mayi mpe na Molimo” elakisi:

— Baptême ya mayi: elembo ya libanda ya kobongola motema mpe kosantisama.

— Baptême ya Molimo Mosantu: mbongwana ya kati mpe bomoi ya sika oyo Molimo Mosantu apesaka.

Tango moto abotami lisusu, akómaka ekelamu ya sika kati na Klisto na nzela ya mosala ya Molimo Mosantu.

Paulo alimboli yango polele na mokanda na ye epai ya Tito:

Tito 3:4-5

*“Kasi tango boboto mpe bolingo ya Nzambe Mobikisi na biso emonanaki, abikisaki biso,
ezalaki te mpo na misala ya bosembo oyo tosali, kasi mpo na mawa na Ye moko,
na nzela ya kosukola ya kobotama lisusu mpe ya kosala sika na Molimo Mosantu.”*

Boye motuna ezali:

- Osili koyamba Molimo Mosantu?
- Ozali kotondisama na Molimo Mosantu lokola elembo mpe elembo ya ete ozali ya Klisto?

Bato oyo batondisami na Molimo, bazali kotambolisama na Molimo (Baloma 8:14).

Bazalaka lisusu te kolanda bizaleli ya mokili.

Bambongwanaka uta na kati, balukaka makambo ya likolo, kasi te ya mokili oyo.

Moto oyo atondi na Molimo akoki lisusu te kozala na molili to kosepela na masumu ya mokili. Kasi akómaka pole kati na molili.

Soki ozali na ntembe ete okokende elongo na Nkolo soki azongi lelo, ezali tango ya kozwa bondimi ya solo — ezali te na makanisi, to na mimeseno ya lingomba, kasi na kobotama lisusu kati na Klisto mpe kofanda ya Molimo Mosantu kati na yo.

Mbala mosusu ozali kokanisa:

“Tango akoya, Nzambe ayebi soki nakokende elongo na Ye to te.”

Kasi kanisa ndakisa oyo:

Soki moyibi alobi ete akoya kobebisa yo na butu, okoloba kaka:

“Eh, ayebi soki akobebisa ngai to te”?

To okokamata matomba mpo na komibatela?

Soki omibongisi te, moyibi akolonga. Kasi soki ozali komibatela,
okoyeba soki akoki kosala yo mabe to te.

Ndenge moko mpe, tosengeli te kotika libela na biso na makanisi
ya polele te.

Tosengeli te koloba: “Nzambe ayebi” lokola ete akopona mpo na
bisio na mokolo wana.

Te. Esengeli tóyeba mpe tózala na bondimi sik’oyo.

Soki totiki nyonso epai na Ye sans kotosa Liloba na Ye,
tokómisaka Nzambe lokola moto ya kopona-bapona — kasi
Nzambe azali moto ya kopona te.

Ozali na bondimi ete soki Nkolo Yesu azongi lelo, okokende
elongo na Ye?

1 Petelo 1:17

*“Mpe soki bozali kobenga Ye Tata, Ye oyo asambisaka moto
nyonso na bosembo, sans kopona, bótambola na bobangi na
tango nyonso ya bofandi na bino awa.”*

Boye, zala na bondimi ya solo. Bótama lisusu.

Ezali te na nzela ya religion.

Ezali te na nzela ya misala malamumu.

Kasi na bondimi kati na Klisto oyo ememaka na kobotama lisusu
na nzela ya Molimo Mosantu.

Maranatha — Nkolo azali koya. Ozali pene?

Share on:
WhatsApp